

სისხლის სამართლის პროცესის სუბიექტების ცნება, კლასიფიკაცია და პროცესუალური ფუნქციები

მიხეილ მამნიაშვილი

სისხლის სამართალწარმოების (პროცესის) მონაწილეები არიან ყველა ის პირები, რომლებიც მონაწილეობას ღებულობენ სისხლის სამართალწარმოების ურთიერთობაში და მათ გააჩნიათ გარკვეული უფლებები და ვალდებულებები. აქედან გამომდინარე, სისხლის სამართლის პროცესის მონაწილეთა ცნება იგივეა, რაც სისხლის სამართალწარმოების სუბიექტთა ურთიერთობის ცნება.

ადრე გამოცემულ იურიდიულ ლიტერატურაში შეიძლება შეგვხვდეს სხვა მოსაზრებებიც. ერთ-ერთი ასეთი შეხედულების თანახმად, სისხლის სამართლის პროცესის ყველა მონაწილე არ მიიჩნეოდა სისხლის სამართალწარმოების ურთიერთობის სუბიექტად, არამედ ასეთებად მოიაზრებოდნენ მხოლოდ ის პირები, რომლებსაც სისხლის სამართლის საქმეში გააჩნდათ გარკვეული მატერიალურ-სამართლებრივი ინტერესი — საკუთარი (ბრალდებული, ეჭმიტანილი, დაზარალებული, სამოქალაქო მოსარჩელე, სამოქალაქო მოპასუხე) ან წარმომადგენლობითი (ადვოკატი, დაზარალებულის წარმომადგენელი, სამოქალაქო მოსარჩელის და მოპასუხის წარმომადგენლები, არასრულწლოვანი ბრალდებულის კანონიერი წარმომადგენელი),¹ ზოგი პროცესუალისტი სისხლის სამართლის პროცესის მონაწილეებად თვლიდნენ ყველა იმ სუბიექტს, რომლებიც სისხლის სამართალწარმოების პროცესში ახორციელებდნენ საპროცესო ფუნქციებს (სისხლის სამართლებრივი დევნა, დაცვა, საქმის გადაწყვეტა), მიუხედავად იმისა, მათ საქმეში გააჩნდათ თუ არა თავიანთი ინტერესი. ამასთანავე, ავტორებს მიაჩნდათ, რომ მოწმე, ექსპერტი, დამსწრე, თარჯიმანი და ა.შ. არ ითვლებოდნენ საპროცესო საქმიანობის სუბიექტებად, რადგანაც თითქოს ისინი არ ახორციელებდნენ არავითარ საპროცესო ფუნქციებს.² ქართველ მეცნიერთა მოსაზრებითაც არ შეიძლება პროცესის მონაწილედ განხილულიყო ყველა ის პირი, ვინც მონაწილეობას ღებულობდა სისხლის სამართლის საქმის გამოძიება-განხილვის დროს. პროცესის მონაწილეთა ასეთი განვარცხვითი გაგება ავტორთა შეხედულებით: „არ გამოდინარებოდა სისხლის სამართლის პროცესის მონაწილის იურიდიული ბუნებისაგან და არ შეესაბამებოდა პროცესის მონაწილის მდგომარეობას,

მიზნებს და ამოცანებს.”³

არსებობდა ასევე სხვა მოსაზრებაც, რომლის თანახმადაც ის პირები, რომლებიც მონაწილეობას ღებულობენ სისხლის სამართალწარმოების პროცესში, საპროცესო საქმიანობის სუბიექტებად მოიაზრებოდნენ,⁴ აქვე უნდა აღინიშნოს ის, რომ საქართველოს სისხლის სამართლის საპროცესო კოდექსის მე-2 კარში სისხლის სამართალწარმოების მონაწილეთა შორის წარმოდგენილი არიან არა მხოლოდ ის პირები, რომლებსაც გააჩნიათ მატერიალურ-სამართლებრივი ინტერესები, და არა მხოლოდ ისინი, რომლებიც ასრულებენ ძირითად ფუნქციებს: სისხლის სამართლებრივი დევნას, დაცვას და საქმის გადაწყვეტას (მართლმსაჯულებას), არამედ სხვა ისეთებიც, რომლებიც არ სარგებლობენ ასეთი უფლებებით. ამიტომაც სისხლის სამართლის საქმეზე დაინტერესებული პირი (ბრალდებული, ადვოკატი, დაზარალებული), ასევე დაუინტერესებული პირები (ორგანო): სასამართლო, პროკურორი, გამოძიებელი, მოწმე, ექსპერტი, სპეციალისტი, თარჯიმანი და დამსწრე — ყველა მათგანი წარმოდგენილი არიან სისხლის სამართლის პროცესის მონაწილეებად.

სისხლის სამართალწარმოების სუბიექტები თავისი ბუნებით არაერთგვაროვანია. საპროცესო კანონმდებლობის შესაბამისად, მათ შეუძლიათ შეასრულონ განსხვავებული პროცესუალური ფუნქციები, ჰქონდეთ სხვადასხვა უფლებები და მოვალეობები, ე.ი. სარგებლობდნენ ერთმანეთისაგან განსხვავებული სამართლებრივი სტატუსით. ამდენად, სისხლის სამართლის პროცესის სუბიექტები არიან სახელმწიფო ორგანოები, თანამდებობის პირები, ასევე ფიზიკური პირები, რომლებიც ახორციელებენ გარკვეულ პროცესუალურ ფუნქციებს, სარგებლობენ შესაბამისი სამართლებრივი სტატუსით და სისხლის სამართალწარმოების პროცესში ამყარებენ პროცესუალურ სამართალურთიერთობას.

სისხლის სამართალწარმოების პროცესუალური ფუნქცია არ შეიძლება დაყვანილი იქნეს უბრალოდ რაოდენობრივ უფლებამოსილებად, ამა თუ იმ სუბიექტის უფლებებსა და მოვალეობებამდე, ე.ი. მათ კომპეტენციამდე.

³ საბჭოთა სისხლის სამართლის პროცესი, გამ. თსუ, თბილისი, 1988, გვ. 84-85; საქართველოს სისხლის სამართლის პროცესი, ავტ. კოლექტივი ა. ფალაიშვილის რედაქციით, გამ. „მერიდიანი“, თბილისი, 2002, გვ. 92-93

⁴ Уголовный процесс, под общей редакцией А.В. Смирнова, изд. Кнорус, М., 2007, с. 90-92

¹ Галкин Б.А. Советский уголовно-процессуальный закон. М., 1962, с. 92

² Строгович М.А., Курс советского уголовного процесса, Т. 1, М., 1968, с. 111, 203-204

პროცესის თითოეულ მონაწილეს საპროცესო სამართალური თვითღირსების დროს გააჩნია თავისი გარკვეული დანიშნულება და ისინი სისხლისსამართალწარმოების პროცესში ასრულებენ თავიანთ ფუნქციებს (გამომძიებელი, პროკურორი, სასამართლო, ბრალდებული, ადვოკატი, მოწმე და ა.შ.). თავის მხრივ, ეს საქმიანობა წარმოშობს ისეთ ურთიერთობებს, რომლებიც შესაძლებელია ერთმანეთს არ დაემთხვეს და ზოგჯერ დიდად განსხვავდებოდნენ კიდევ ერთმანეთისაგან; პროცესის მონაწილის თითოეული პროცესუალური საქმიანობა, რომლებსაც ისინი ახორციელებენ, ახლოს დგას ერთმანეთთან, ზოგჯერ კი შეიძლება გადაიკვეთოს, მაგრამ სისხლისსამართალწარმოების პროცესის მონაწილეთა საქმიანობა, რომლებიც სხვადასხვა მიმართულებით მოქმედებენ, მათი უფლებამოსილება საპროცესო კანონმდებლობით მკაცრადაა გამიჯნული და ერთმანეთს არ ერწყმის, რადგანაც მათ საფუძვლად უდევთ ურთიერთსაწინააღმდეგო პროცესუალური ინტერესები, კერძოდ, არ შეიძლება ბრალდების მხარეს დაეკისროს დაცვის ფუნქცია და პირიქით, დაცვის მხარეს დაეკისროს ბრალდების ფუნქცია.⁵ ასეთი ინტერესების აღკვეთის დაშვება ერთსა და იმავე პროცესის მონაწილის საქმიანობაში იმას ნიშნავს, რომ სისხლისსამართალწარმოების პროცესის წარმოებისას საშიშროების წინაშე დადგეს ობიექტურობა და მიუკერძოებლობა; შეიძლება დამაჯერებლად ითქვას, რომ „ფუნქციის“ ცნების დახმარებით პროცესუალური საქმიანობა ისეთნაირად უნდა იყოს მიმართული, რომ საპროცესო საქმიანობის სუბიექტთა ურთიერთსაწინააღმდეგო ინტერესები ერთმანეთს კი არ უნდა უშლიდეს ხელს, არამედ პირიქით, ემსახურებოდნენ და განაპირობებდნენ სისხლის სამართალწარმოების საერთო მიზნებსა და ამოცანებს.

შეჯიბრებითობის პროცესში ჩვეულებრივად მიღებულია გამოყოფილი იქნეს შემდეგი ძირითადი ფუნქციები: ბრალდების (სისხლისსამართლებრივი დევნის), დაცვის, საქმის განხილვის და გადაწყვეტის (მართლმსაჯულების) ფუნქციები. ამასთანავე, იურიდიულ ლიტერატურაში არაერთი ავტორის მიერ გამოთქმულია მოსაზრება იმის შესახებ, რომ თანამედროვე საჯარო-შეჯიბრებითობის სისხლის სამართლის პროცესის თავისებურებიდან გამომდინარე, შეიძლება ცალკე ფუნქციად გამოეყოს კიდევ ერთი — დამხმარე ფუნქცია, რომელსაც შეიძლება მართლმსაჯულების განხორციელების ხელშეწყობი ეწოდოს (მოწმე, ექსპერტი, სპეციალისტი, თარ-

ჯიმანი და ა.შ.).⁶

ჩვენი აზრით, ცალკე ფუნქციად უნდა არსებობდეს ასევე გამოძიების ფუნქცია, რადგანაც საქართველოს სისხლის სამართლის საპროცესო კანონმდებლობიდან გამომდინარე, გამოძიება არის სისხლის სამართლის პროცესის პირველი დამოუკიდებელი სტადია და გამომძიებლის სტატუსისა და ამ ფუნქციის იგნორირება არაფრით არ არის გამართლებული, მით უმეტეს, რომ ადრეულ წლებში სისხლისსამართალწარმოების პროცესში გამოძიების ფუნქციასაც მყარად ჰქონდა დამკვიდრებული თავისი ადგილი.

პროცესუალური ფუნქციების მნიშვნელობა, უპირველეს ყოვლისა, მდგომარეობს მასში, რომ ის დგას მართლმსაჯულების განმახორციელებელი ობიექტური და მიუკერძოებელი სასამართლოს დაცვის სადარაჯოზე. თუ კი სასამართლო თავის საქმიანობაში შეეცდება ერთდროულად შეითავსოს ბრალდებულის, სისხლისსამართლებრივი დევნისა და საქმის გადაწყვეტის ფუნქციები, ის ვერ შეძლებს იყოს ობიექტური და მიუკერძოებელი, მისი საქმიანობის პრიორიტეტი გახდება არა მხოლოდ მართლმსაჯულების განხორციელება, არამედ სისხლისსამართლებრივი დევნის მოთხოვნების რეალიზაცია, რაც ასევე მართლმსაჯულების მიზანს დემორჩილება; იმისათვის, რომ მსჯავრი დაედოს პიროვნებას, ჯერ უნდა დადგინდეს და მხილებული იქნეს მის მიერ ჩადენილი დანაშაულები, ეს კი მხოლოდდამხოლოდ ბრალმდებლის პეროგატივაა, რომელიც ვალდებულია საპროცესო კანონმდებლობის სრული დაცვით, გამამტყუნებელ მტკიცებულებათა წარდგენის გზით დაარწმუნოს სასამართლო ბრალდებულის ბრალეულობაში და პირიქით, თუ კი სისხლისსამართლებრივი დევნის თანამდებობის პირს მინიჭებული ექნება ერთდროულად სასამართლო უფლებამოსილებაც, ბუნებრივია, მისი საქმიანობა მიმართული იქნება იმისაკენ, რომ ბრალდების ფუნქციის ნაცვლად საქმის გადაწყვეტაც შეითავსოს. აქედან გამომდინარეობს შეჯიბრებითობის გარდუვალობის წესი, რომელიც გამომდინარეობს დამოუკიდებელი სასამართლოს საბაზისო პრინციპიდან — „არავინ არ უნდა იყოს მოსამართლე თავის საკუთარ საქმეში“.

ასევე დაუშვებელია არა მარტო სასამართლო უფლებამოსილების, არამედ ასევე ნებისმიერი სხვა ფუნქციის შეთავსება. ზედმეტია მტკიცება იმ ფაქტისა, რომ არ შეიძლება პირი იყოს ადვოკატი და ამასთან ერთად დაინტერესებული ბრალდებულის ბრალეულობის დადასტურებით; ამასთანავე, აშკარაა, რომ ადვოკატს უფლება არა აქვს სა-

⁵ М.В. Григорьев, А.В. Победник, В.Н. Яшин, Уголовный процесс, Учебник, изд. Эскмо, М., 2006, с. 84-85; А.П.Рыжаков, Сергеев А.И. Субъекты уголовного процесса, Тула, 1996, с. 6.

⁶ Уголовный процесс, под ред. общей ред. А.В. Смирнова, Изд. Кнорус, М., 2007, с. 90-10

სამართლოში წარადგინოს ბრალდების გამამტყუნებელი მტკიცებულება, მხარი დაუჭიროს საბრალდებო მტკიცებულებებს, თავის დაცვის ქვეშ მყოფი პირი გამოაცხადოს დამნაშავედ, თუ კი ბრალდებული წარდგენილ ბრალდებას უარყოფს.

სისხლისსამართლებრივი დევნის განხორციელების პროცესში შეიძლება გარკვეული გამოწვევების არსებობაც, როდესაც კანონით გათვალისწინებული პირობების არსებობის შემთხვევაში მოხდეს ბრალდებისა და დაცვის ფუნქციების გადაკეცვა, მხედველობაში გვაქვს ისეთი შემთხვევა, როდესაც პროკურორი ჩატარებული გამოძიების მასალებზე დაყრდნობით მივა იმ დასკვნამდე, რომ აუცილებელია ბრალდებულის მიმართ სისხლისსამართლებრივი დევნის შეწყვეტა, ანდა სასამართლო გამოძიების მსვლელობისას პროკურორი დარწმუნდება ბრალდებულის უდანაშაულობაში და უარს იტყვის ბრალდებაზე. ასეთ დროს პროკურორმა იურიდიულად უნდა დაასაბუთოს თავისი მოსაზრებები, პირველ შემთხვევაში სისხლისსამართლებრივი დევნის შეწყვეტის დადგენილებაში, ხოლო მეორე შემთხვევაში სასამართლოს პროცესზე თავისი არაგუმონებული გამოხატული იმის შესახებ, რომ ბრალდებული უდანაშაულოა და ის უნდა გათავისუფლდეს სისხლისსამართლებრივი პასუხისმგებლობისგან. ასეთ დროს ადგილი აქვს ისეთ სიტუაციას, როდესაც ბრალდებულის ინტერესებს უპირატესობა ენიჭება, რადგან ბრალმდებელმა ასეთ დროს შეიძლება დაიკავოს დაცვის პოზიცია, ხოლო ადვოკატმა თავის მხრივ, არც ერთ შემთხვევაში არაბოდე არ უნდა დაიკავოს ბრალდების პოზიცია.

შეჯიბრებითობის საწყისებზე გამოძიების, ბრალდების, დაცვის, საქმის განხილვის და გადაწყვეტის (მართლმსაჯულების) ფუნქციების რეალიზაცია იძლევა შესაძლებლობას მოხდეს მხარეთ ურთიერთ-საწინააღმდეგო ინტერესების იზოლირება, რაც, თავის მხრივ, ობიექტური და სამართლიანი მართლმსაჯულების განხორციელების საწინდარია. მხარეთა პაექრობა ღია სამართლიან სასამართლო კამათში წარმოადგენს შეჯიბრებითობის პროცესის წინსვლისა და განვითარების უმნიშვნელოვანეს წყაროს.

ამდენად, შეგვიძლია მოკლედ ჩამოვყალიბოთ პროცესუალური ფუნქციის ცნება, რომ ის არის პროცესუალური საქმიანობის ისეთი მიმართულება, რომლებშიც სამართალწარმოების სხვადასხვა სუბიექტები გაერთიანებულნი არიან ცალკეულ ჯგუფებად, განსაზღვრავს მათ სამართლებრივ სტატუსს, ერთნაშთისაგან მიჯნავს ურთიერთ-საწინააღმდეგო ინტერესების მქონე სუბიექტების პროცესუალურ საქმიანობას და წარმართავს სისხლისსამართალწარმოებას საერთო ამოცანების მისაღწევად. მოკლედ შეიძლება ითქვას, რომ სისხ-

ლის სამართლის პროცესუალური საქმიანობის ძირითად მიმართულებას, რომლებშიც გამოხატულია პროცესის მონაწილეთა სპეციალური როლი და დანიშნულება, ეწოდება პროცესუალური ფუნქცია.⁷

პროცესის მონაწილეთა სამართლებრივი სტატუსი სისხლისსამართალწარმოების პროცესში წარმოადგენს მათი უფლებებისა და მოვალეობების ერთობლიობას, რომლებიც რეგულირებულია საპროცესო კანონმდებლობით და მათი საქმიანობა არ შეიძლება გასცდეს კანონის ჩარჩოებს. მაგალითად, არამართლზომიერია სისხლის სამართლის საქმის დაწყება დაეკისროს სასამართლოს, რადგანაც ეს მოქმედება არ შედის მართლმსაჯულების ფუნქციაში და ა.შ.

რამდენადაც პროცესუალური ფუნქციის ცნება ეყრდნობა პროცესის მონაწილეთა დაყოფას ჯგუფებად, ისეთი არსებითი კრიტერიუმების გათვალისწინებით, როგორცაა განსხვავებული პროცესუალური ინტერესები, მიზანშეწონილია თვით ფუნქციის ცნება საფუძვლად დაედოს პროცესის მონაწილეთა კლასიფიკაციას. თუ გავითვალისწინებთ სისხლისსამართალწარმოების პროცესში პროცესუალური ფუნქციების არსებობას: მართლმსაჯულებას, გამოძიებას, ბრალდებას (სისხლისსამართლებრივი დევნა) და დაცვას, მაშინ პროცესის მონაწილეთა კლასიფიკაცია შეჯიბრებითობის პროცესში შეიძლება შემდეგნაირად გამოიყურებოდეს:

1. სამართალწარმოების სუბიექტები, რომლებიც მართლმსაჯულების ფუნქციას ახორციელებენ, ე.ი. საქმის სასამართლოში განხილვა და გადაწყვეტა, უპირველეს ყოვლისა, ამ ფუნქციას ახორციელებენ სასამართლო ორგანოები, რომლებიც საქმეს არსებითად განიხილავენ; მასში შედის ასევე ზემდგომი ინსტანციის (აპელაცია, კასაცია) სასამართლოები, მათ შორის: კანონიერ ძალაში შესული განაჩენის გადასინჯვა ახლად გამოვლენილ გარემოებათა გამო, და ის მოსამართლეები (მაგისტრის მოსამართლეები), რომლებიც ისეთ პროცესუალურ საკითხებს განიხილავენ, რომლებიც დაკავშირებულია პიროვნების უფლების შეზღუდვასთან (ჩხრეკა, ამოღება, დაპატიმრება და ა.შ.); მართლმსაჯულების ფუნქციას ახორციელებენ ასევე ნაფიცი მსაჯულები, თუ კი საქმე მათი მონაწილეობით განიხილება.

2. გამოძიების ფუნქციები. სისხლის სამართლის საქმეთა გამოძიებას აწარმოებენ იუსტიციის სამინისტროს, სასჯელაღსრულების, პრობაციის და იურიდიულ საკითხთა სამინისტროს და ფინანსთა სამინისტროს დანაყოფების გამომძიებლები, გამომძიებლები ვალდებული არიან, სისხლის სამართლის საპროცესო კანონმდებლობის შესაბამისად,

⁷ Уголовный процесс. Учебник под ред. А. В. Гриненко, изд. Норма, М., 2009 г. 64-66.

დაიწყო გამოძიება, ჩაატარონ საგამოძიებო მოქმედებები, უზრუნველყონ საქმის სრულყოფილი და ობიექტური გამოძიება.

3. სამართალწარმოების ის მონაწილეები, რომლებიც ბრალდების ფუნქციას ახორციელებენ, ესენია პროკურორი და გამოძიებელი; სახელმწიფო ბრალმძებელი სასამართლოში.

4. მონაწილეები, რომლებიც ახორციელებენ დაცვის ფუნქციას, ესენია ბრალდებული, მსჯავრმდელი, გამართლებული და ადვოკატი.

5. პროცესის მონაწილეები, რომლებიც ხელს უწყობენ მართლსაჯულების განხორციელებას. საქართველოს სისხლის სამართლის საპროცესო კოდექსი (თავი VI) მათ „სისხლის სამართლის პროცესის სხვა მონაწილეებად“ მოიხსენიებს. აღნიშნულ ფუნქციას ახორციელებენ მოწმე, ექსპერტი, თარჯიმანი, მათ შორის დაზარალებული, დაზარალებულის უფლებამონაცვლე ან იურიდიული პირის უფლებამოსილებით აღჭურვილი, რომლებიც დაზარალებულის სტატუსით სარგებლობენ.

Concept and Classification of Subjects of Criminal Process. Procedural Functions

Mikheil Mamniashvili

Summary

Concept, classification of trial participants and their authority are given in the article, namely, status of prosecuting party: prosecutor, investigator, status of pleading party: accused person, lawyer, as well as status of participants of that trial, who assist justice to determine accusation of a person in a crime at high level of probability have been researched, status of each trial participant and their relationships arranged by law have been considered.